

**VENDIM**  
**Nr. 872, datë 27.12.2022**

**PËR DISA NDRYSHIME DHE SHITESA NË VENDIMIN NR. 519, DATË 13.7.2016, TË KËSHILLIT TË MINISTRAVE, "PËR MIRATIMIN E MODELIT TË TREGUT TË ENERGIJË ELEKTRIKE"**

Në mbështetje të nenit 100 të Kushtetutës dhe të pikës 3, të nenit 97, të ligjit nr. 43/2015, "Për sektorin e energjisë elektrike", të ndryshuar, me propozimin të zëvendëskryeministrit dhe ministër i Infrastrukturës dhe Energjisë, Këshilli i Ministrave

VENDOSI:

I. Në tekstin "Modeli Shqiptar i Tregut", që i bashkëlidhet vendimit nr. 519, datë 13.7.2016, të Këshillit të Ministrave, bëhen këto ndryshime dhe shtesa:

1. Në pjesën "Hyrje", përkufizimi **"Bursa Shqiptare e Energjisë"** – platforma e organizuar për shitjen dhe blerjen e energjisë elektrike në bazë të ditës në avancë dhe/ose brenda së njëjtës ditë", ndryshohet, si më poshtë:

**"Operatori i tregut - Bursa Shqiptare e Energjisë (BSHE)"** është struktura përgjegjëse për menaxhimin dhe operimin e tregut të organizuar me shumicë të energjisë elektrike nëpërmjet platformës elektronike të tregtimit, platformës elektronike të klerimit dhe të shlyerjeve financiare për tregjet e ankandëve të ditës në avancë dhe brenda së njëjtës ditë, si dhe tregjeve të vazhdueshme brenda së njëjtës ditë, ndërmjet anëtarëve të Bursës, në përputhje me modelin e tregut të energjisë elektrike dhe rregullat e tregut të energjisë elektrike;"

2. Në pikën 2 "Objektivat", bëhen këto ndryshime:

a) Në paragrafin "Parimet kryesore të modelit të tregut ...", parimi i parë dhe i katërt, ndryshohen, si më poshtë:

"- zbatimi i mbikëqyrjes dhe monitorimit të tregut, me qëllim shmangien e abuzimit në treg";

- të gjitha format e tjera të tregtimit mund të jenë financiare ose fizike;"

b) Paragrafi i pestë ndryshohet, si më poshtë vijon:

"Për përmbushjen e këtij objekti kërkohet:

- OST-ja të vendosë në dispozicion të tregut të organizuar një sasi minimum (50%) të kapaciteteve ndërkufitare të disponueshme, që i përket bashkimit respektiv të tregjeve. Sasia e vlerës minimale duhet të rishikohet në vijueshmëri dhe mund të ndryshohet në bazë të një vlerësimi të propozuar nga ana e OST-së dhe të miratuar nga ERE. BSHE-ja ka të drejtë t'i kërkojë OST-së iniciimin e procesit të mësipërm të rishikimit të sasisë minimale."

3. Në pikën 3 "Rolet e modelit të tregut", bëhen këto ndryshime dhe shtesa:

a) Në nënndarjen 3.3 "Pala Përgjegjëse Balancuese (PPB)", bëhen këto ndryshime dhe shtesa:

i. Paragrafi i gjashtë ndryshohet, si më poshtë vijon:

"Tregtimet e brendshme afatgjata OTC mund të bazohen në një kontratë financiare ose fizike. Në rast kur OTC-ja bazohet në një kontratë financiare, energjia elektrike fizike do të tregtohet nga BSHE-ja dhe çmimi i BSHE-së do të jetë çmimi i referencës për kontratën financiare. ERE do të miratojë kontratën tip financiare OTC."

ii. Në fund të nënndarjes shtohet paragrafi, me këtë përmbajtje:

"BSHE do të trajtohet si PPB me të drejta të veçanta, sipas parashikimeve në Rregullat e Tregut Shqiptar të Balancimit (RrTSHB). OST-ja ngarkohet të reflektojë këto parashikime në RrTSHB."

b) Nëndarja 3.5 "Bursa Shqiptare e Energjisë", ndryshohet, si më poshtë vijon:

"3.5. BSHE kryen funksionet:

a) e Operatorit të Tregut në Shqipëri, sipas parashikimeve të ligjit nr. 43/2015, "Për sektorin e energjisë elektrike", të ndryshuar, të këtij vendimi dhe rregullave të tregut, me licencimin nga

ERE-ja;

b) e sigurimit të platformës elektronike të nevojshme për tregtimin e energjisë elektrike në tregun e ditës në avancë dhe tregjet brenda së njëjtës ditë;

c) e sigurimit të platformës elektronike të klerimit dhe shlyerjes financiare të transaksioneve në tregjet e BSHE-së;

ç) e kundërpalës qendrore në garantimin e transaksioneve të palëve të tjera pjesëmarrëse në Bursë, nëpërmjet kërkesave të saj, rregullave përkatëse të tregut për nevojën e garancive, llojeve të tyre, të cilat do të ekzekutohen nga BSHE-ja, në rast të mospërbushjes së detyrimeve;

d) e monitorimit dhe mbikëqyrjes së tregut të organizuar, në përputhje me kërkesat e rregullores për integritet, transparencë (REMIT);

dh) e hartuesit të rregullave për tregtimin në Bursë, për t'u paraqitur për aprovim tek ERE-ja.

Në kuadër të përmbushjes së këtyre funksioneve, BSHE-ja kryen këto detyra:

a) siguron të gjitha platformat e mësipërme për operimin e tregjeve të BSHE-së;

b) pranon kërkesa dhe oferta për të blerë dhe shitur energji nga anëtarët e Bursës;

c) merr dhe proceson kapacitetet e interkonjeksionit nga OST-ja, si dhe informacione të tjera përkatëse;

ç) kryen ankandet e nevojshme dhe operacionet tregtare, në përputhje me rregullat e miratuara, duke përdorur për këtë qëllim, algoritmet e *European Market Coupling*;

d) i dërgon anëtarëve përkatës të Bursës/anëtarëve të klerimit dhe OST-së, sipas afateve të përcaktuara, konfirmimet tregtare, duke përfshirë sasinë e alokuara dhe çmimet;

dh) publikon sasinë e shpërndara dhe çmimet përkatëse, sipas afateve të përcaktuara;

e) i dërgon anëtarëve përkatës të Bursës/anëtarëve të klerimit, në përputhje me afatin e rënë dakord, njoftimet e rezultateve;

ë) ekzekuton garancitë për shlyerjen e detyrimeve për anëtarët përkatës të Bursës/klerimit, në përputhje me rregullat dhe afatet e përcaktuara;

f) mban dokumentet e transaksioneve;

g) mban dhe përditëson kalendarin e tregtimeve dhe të klerimeve;

gj) respekton kërkesat për transparencë dhe ushtron kompetenca të monitorimit të tregut;

h) garanton që platformat e BSHE-së janë të aksesueshme nga personat e certifikuar nga BSHE-ja;

i) të vlerësojë kërkesat për anëtarësim në BSHE, në përputhje me kërkesat e anëtarësimit;

j) të lidhë marrëveshje me aplikantët për pranimin e tyre në BSHE, në përputhje me kërkesat e anëtarësimit;

k) të konsultojë në vazhdimësi me palët e interesuar rregullat e BSHE, për çdo ndryshim të nevojshëm;

l) të procesojë urdhërporositë nga anëtarët e Bursës, duke i dërguar ato tek Operatori i Bashkimit të Tregjeve, për procesimin e nxjerrjes së rezultateve, duke përdorur algoritmet evropiane;

ll) të publikojë volumet e energjisë elektrike të alokuara dhe çmimet përkatëse, sipas afateve të përcaktuara;

m) të regjistrojë të gjitha transaksionet mbi tregjet e BSHE-së, të cilat do të jenë automatikisht të detyrueshme për t'u shlyer;

n) të marrë vendimet e nevojshme për integritetin dhe operimin e rregullt, duke përfshirë:

i. monitorimin e përputhshmërisë së anëtarëve të Bursës me rregullat dhe procedurat e BSHE-së;

ii. kryerjen e auditimeve dhe inspektimeve për aktivitetet e anëtarëve të Bursës.

Bursa Shqiptare e Energjisë kontraktin kryerjen e një apo më shumë shërbimeve të sipërcituara nga çdo subjekt që mund të ushtrojë këtë aktivitet, në përputhje me licencën e lëshuar nga ERE-ja.

Bursa Shqiptare e Energjisë zbaton planin e masave për implementimin e Tregut Shqiptar të Energjisë Elektrike, të përcaktuar në aneksin 1, që i bashkëlidhet këtij vendimi.

4. Aneksi 1 “Plani i masave për implementimin e Tregut Shqiptar të Energjisë Elektrike”, zëvendësohet me aneksin 1, që i bashkëlidhet këtij vendimi.

5. Aneksi 2 “Plani i veprimit për krijimin e BSHE-së”, shfuqizohet.

II. Ngarkohen Ministria e Infrastrukturës dhe Energjisë, Enti Rregullator i Energjisë, Korporata Elektroenergjetike Shqiptare (KESH) sh.a., Operatori i Sistemit të Transmetimit (OST) sh.a., Operatori i Shpërndarjes së Energjisë Elektrike *Group* (OSHEE *Group*) sh.a., dhe Bursa Shqiptare e Energjisë Elektrike (BSHE) sh.a., për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTËR  
Edi Rama

**Faza e parë- duke filluar nga 1 janari 2023**

<b>Tregu i rregulluar</b>			
<b>Blerjet (MWh)</b>		<b>Shitjet (MWh)</b>	
Tarifat e rregulluara në nivelet 20, 10, 6 *dhe 0,4 kV	5,213,143	5,213,143	KESH
Humbjet e OSSH	1,366,592	1,366,592	
<b>Total</b>	<b>6,579,735</b>	<b>6,579,735</b>	<b>Total</b>
<b>Tregu i parregulluar</b>			
<b>Blerjet (MWh)</b>		<b>Shitjet (MWh)</b>	
Konsumatorët në 35 kV	80,120		
<b>Total</b>	<b>80,120</b>	<b>80,120</b>	<b>Total</b>

**Faza e dytë- duke filluar nga janari 2024**

<b>Tregu i rregulluar</b>			
<b>Blerjet (MWh)</b>		<b>Shitjet (MWh)</b>	
Tarifat e rregulluara në nivelin 0,4 kV	4,887,058	<b>6,238,045</b>	KESH
Humbjet e OSSH	1,350,987		
<b>Total</b>	<b>6,238,045</b>	<b>6,238,045</b>	<b>Total</b>
<b>Tregu i parregulluar</b>			
<b>Blerjet (MWh)</b>		<b>Shitjet (MWh)</b>	
	N/A	N/A	
Blerjet në voltazhin e lartë		<b>435,482</b>	
Konsumatorët në 35 kV	80,563		
Konsumatorët në 20 kV	245,086		
Konsumatorët në 10/6 kV	109,833		
<b>Total</b>	<b>435,482</b>	<b>435,482</b>	<b>Total</b>

\*Duke filluar nga janari 2022 të gjithë konsumatorët e lidhur në 20/10/6 kV janë në treg të liberalizuar dhe mund të zgjedhin lirisht furnizuesin e tyre.

Bazuar në ligjin nr. 43/2015 "Për sektorin e energjisë elektrike", të ndryshuar, ata do të vijojnë të furnizohen nga furnizuesi i mundësisë së fundit për një periudhë 2-vjeçare, deri në 31 dhjetor 2023.